

**ALL INDIA RADIO  
RNU :: KOLKATA  
BENGALI TEXT BULLETIN**

**DATE – 21.08.2017**

**TIME – 01:40 P.M.**

মুখ্যমন্ত্রী মমতা ব্যানার্জী আজ মালদা থেকে দক্ষিণ দিনাজপুরের বুনিয়াদপুরের উদ্দেশ্যে রওনা দিয়েছেন । সেখানকার বন্যা পরিস্থিতি খতিয়ে দেখার পর আবার তিনি মালদায় ফিরে এসে প্রশাসনিক বৈঠক করবেন ।

উল্লেখ্য, মালদা ও দক্ষিণ দিনাজপুরের বন্যা পরিস্থিতি খতিয়ে দেখতে গতকালই তিনি বহরমপুর হয়ে সড়কপথে মালদায় পৌঁছেন ।

\*\*\*\*\*

রাজ্যের সামগ্রিক বন্যা পরিস্থিতির উন্নতি হয়েছে । রাজ্যের মোট ৬-টি জেলা এবারের বন্যায় সর্বাধিক ক্ষতিগ্রস্ত হয়েছে । গত ২৪ ঘন্টায় বন্যায় মৃতের কোন খবর নেই । রাজ্য সরকারের বিপর্যয় মোকাবিলা দফতরের আধিকারিক জানিয়েছেন, বন্যা পরিস্থিতির ওপর সরকার সতর্ক নজর রাখছে । তবে, বন্যার জল ধীরে ধীরে নামলেও কয়েকটি জেলায় জলবাহিত রোগ ছড়িয়ে পড়ার আশঙ্কা দেখা দিয়েছে । গত ২১-শে জুলাই থেকে রাজ্যের বন্যায় এপর্যন্ত মোট ৫৫ জনের মৃত্যু হয়েছে । বন্যায় ক্ষতিগ্রস্ত মানুষের সংখ্যা প্রায় ৫৫ লক্ষ । সর্বাধিক ক্ষতিগ্রস্ত জেলাগুলি হল কোচবিহার, উত্তর ও দক্ষিণ দিনাজপুর, জলপাইগুড়ি, আলিপুরদুয়ার ও মালদা । ৭৫ হাজারেরও বেশি বাড়ি ধ্বংস হয়ে গেছে এবং ২ লক্ষেরও বেশি বাড়ি আংশিক ক্ষতিগ্রস্ত হয়েছে ।

আলিপুর আবহাওয়া দফতর থেকে জানানো হয়েছে, আগামী ২৪ ঘন্টায় উত্তর ও দক্ষিণবঙ্গের জেলাগুলিতে বৃষ্টিপাতের পরিমাণ কমবে। স্বহনীয় পূর্বাভাসে বলা হয়েছে, আকাশ প্রধানত মেঘলা থাকবে। বজ্রবিদ্যুত সহ কয়েক পশলা বৃষ্টির সম্ভাবনা। গতকাল দিনের সর্বোচ্চ তাপমাত্রা ছিল ৩৩ ডিগ্রী সেলসিয়াস, স্বাভাবিকের থেকে ১ ডিগ্রী বেশি।

আজ সকালে সর্বনিম্ন তাপমাত্রা ছিল ২৬ দশমিক ৬ ডিগ্রী সেলসিয়াস, স্বাভাবিক। গত ২৪ ঘন্টায় বৃষ্টি হয়েছে ৪ মিলিমিটার।

\*\*\*\*\*

বন্যার জন্য এখনও উত্তরবঙ্গ ও উত্তর পূর্বাঞ্চলের সঙ্গে রেল যোগাযোগ বিপর্যস্ত। উত্তরপূর্ব সীমান্ত রেল জানিয়েছে, আজ হাওড়া, শিয়ালদহ ও কলকাতা স্টেশন থেকে ১০-টি ট্রেনের যাত্রা বাতিল থাকছে। এর মধ্যে রয়েছে কাঞ্চনজঙ্ঘা, তিস্তা-তোর্সা, সরাইঘাট, কামরূপ, উত্তরবঙ্গ, কাঞ্চনকন্যা ও রাধিকাপুর এক্সপ্রেস এবং দার্জিলিং মেল। সংশ্লিষ্ট ডাউন ট্রেন বাতিল হওয়ায় কলকাতা স্টেশন থেকে মৈত্রী এক্সপ্রেস আজ বাতিল করা হয়েছে।

বেশকিছু ট্রেনের যাত্রাপথ সংক্ষিপ্ত করা হয়েছে। 13161 UP কলকাতা – বালুরঘাট এক্সপ্রেস এবং 13063 UP হাওড়া বালুরঘাট এক্সপ্রেস আজ বুনিয়াদপুর পর্যন্ত যাবে। 13162 down ও 13064 down সেখানে থেকেই যাত্রা শুরু করবে।

13159 UP কলকাতা – যোগবানি এক্সপ্রেস আজ ফরবেশগঞ্জ পর্যন্ত যাবে এবং 13160 down সেখানে থেকেই যাত্রা শুরু করবে।

\*\*\*\*\*

কালিম্পং থানায় শনিবারের গ্রেনেড বিস্ফোরণের ঘটনায় জড়িতদের খুঁজেবের করতে পুলিশ ও নিরাপত্তা বাহিনী আজ দার্জিলিং পাহাড়ে বিভিন্ন এলাকায় তল্লাশি চালায় ।

এদিকে, প্রাথমিক তদন্তে পুলিশ জানতে পেরেছে কালিম্পং থানার কাছে তিনজনের একটি দল এই বিস্ফোরণ ঘটায় । তাদের একজন স্থানীয় যুবক এবং গোখা লিবারেশন আর্মির সদস্য । পুলিশ জানতে পেরেছে মুখঢাকা অবস্থায় একজন বাইক চালিয়ে অন্য দুজনকে থানার সমানে নিয়ে আসে ।

উল্লেখ্য, কালিম্পং থানায় গ্রেনেড হামলার ঘটনায় গোখা জনমুক্তি মোর্চার সভাপতি বিমল গুরুং, মোর্চা নেতা প্রকাশ গুরুং, প্রবীণ সুব্বা, বারুদ থাপা ও দাওয়া লেপচা এবং অন্যদের বিরুদ্ধে বেআইনী কার্যকলাপ নিরোধ আইন ইউ এ পি এ-র অধীনে মামলা রুজু করা হয়েছে ।

শনিবার রাত পৌনে ১১-টা নাগাদ এই হামলার ঘটনা ঘটে । গ্রেনেড বিস্ফোরণে নিহত হন সিভিক পুলিশ কর্মী রাকেশ রাউত । গুরুতর জখম হন হোমগার্ড খেন্দু ভুটিয়া । তাঁকে শিলিগুড়ির নার্সিং হোমে ভর্তি করা হয়েছে । তদন্তে নেমে পুলিশের সন্দেহ, নেপাল এবং উত্তর পূর্বাঞ্চলের জঙ্গীরা , এই হামলার পেছনে রয়েছে । মোর্চা নেতারাও এতে জড়িত বলে কালিম্পং-এর পুলিশ সুপার অজিত সিং যাদব জানিয়েছেন । এদিকে, শুক্রবার রাতে দার্জিলিং-এর চক বাজার থানার অদূরে আই ই ডি বিস্ফোরণের পরেই কালিম্পং থানায় গ্রেনেড হামলায় গোখাল্যান্ডের দাবিতে আন্দোলনকারীদের হাত থাকার অভিযোগ উঠেছে। যদিও আন্দোলনকারীরা এই অভিযোগ খারিজ করে দিয়ে, এর পেছনে বাইরের

শক্তির হাত থাকার নানা অভিযোগ করেছে । মোর্চা নেতৃত্ব এন আই এ-কে দিয়ে তদন্তের দাবি জানিয়েছে । GNLF- ও উচ্চ পর্যায়ের তদন্ত দাবি করেছে ।

এদিকে, তদন্তকারী সিআইডি অফিসাররা দার্জিলিং এবং কালিম্পং-এ ঘটনাস্থল ঘুরে দেখেন । কাশিয়াং-এর ৬ নম্বর ওয়ার্ডের প্রজন কাউন্সিলর নীরজ প্রধানকে পুলিশ নাশকতামূলক কাজে জড়িত থাকার অভিযোগে গ্রেপ্তার করেছে ।

দার্জিলিং পাহাড়ে পৃথক গোখাল্যান্ডের দাবিতে গোর্খা জনমুক্তি মোর্চার ডাকা ধর্মঘট ৬৮ দিনে পড়ল ।

\*\*\*\*\*

উত্তর ২৪ পরগণার ব্যারাকপুরের সুভাষ কলোনিতে আজ এক দম্পতির মৃতদেহ উদ্ধারের ঘটনায় চাঞ্চল্যের সৃষ্টি হয় । সৌরভ দাস ও তার স্ত্রী মন্টি দাস গলায় ফাঁস লাগিয়ে আত্মহত্যা করেন বলে পুলিশ জানিয়েছে । মৃতদেহ দুটি ময়না তদন্তের জন্য পাঠানো হয়েছে । টিটাগড় থানার পুলিশ তদন্ত করেছে ।

\*\*\*\*\*

উত্তর ২৪ পরগণার নিউ-টাউন-এ আজ সকালে পথ দুর্ঘটনায় ৫ বছরের একটি শিশুর মৃত্যু হয়েছে । পুলিশ সূত্রে জানা গেছে মা-বাবার সঙ্গে যাবার সময় শিশুটি হঠাৎ রাস্তায় দৌড়াতে থাকে । সেই সময় একটি লরির ধাক্কায় সে মারা যায়। এই ঘটনার জেরে উত্তেজিত জনতা লরিটি ভাঙচুর চালায় । লরির চালক পলাতক।

\*\*\*\*\*

কলকাতার কসবা থানা এলাকার ডালিয়াপাড়া বস্তিতে একটি ক্লাবঘরে গত রাতে মদ্যপ অবস্থায় বন্ধুদের মধ্যে বচসার সময় একজন হুঁটের আঘাতে গুরুতর

জখম হয় । ২৭ বছর বয়সী আহত প্রভাস মন্ডলকে স্থানীয় নার্সিংহোমে ভর্তি করা হয়েছে। আজ দুপুর ১২টা নাগাদ আশিষ ঠাকুর নামে একজনকে পুলিশ গ্রেপ্তার করেছে । আগামীকাল তাকে আদালতে তোলা হবে । অন্যদের খোঁজে তল্লাশী চলছে। স্থানীয় বাসিন্দারা ক্লাবটি ভেঙে দিয়েছেন ।

\*\*\*\*\*

বীরভূমের রামপুরহাটে সানঘাটা মোড়ে আজ সকাল ১১টা নাগাদ পথদুর্ঘটনায় একজনের মৃত্যু হয়েছে । গুরুতর আহত দু'জন । বেশ কয়েকজন আহত । তারাপীঠে পূজো দিয়ে ট্রেকারে করে ফেরার সময় এই রুটে আসা একটি ট্রাক্টর হঠাৎ ঘুরে ট্রেকারটিকে ধাক্কা মারে । গুরুতর আহত তিনজনকে রামপুরহাট মেডিকেল কলেজ হাসপাতালে নিয়ে গেলে তাদের মধ্যে একজনকে চিকিৎসকরা মৃত বলে ঘোষণা করেন । বাকী দুজনের হাসপাতালে চিকিৎসা চলছে । অন্যদের প্রাথমিক চিকিৎসার পর ছেড়ে দেওয়া হয় । দুটি গাড়ির চালককে গ্রেপ্তার করা হয়েছে ।

\*\*\*\*\*